

17 SEP, 2020

Pasarkan serunding ke seluruh negara

Sinar Harian, Malaysia

Page 1 of 2

Pasarkan serunding ke seluruh negara

Rashidah memanfaatkan teknologi digital jual produk, raih pendapatan sehingga RM20,000 sebulan

Oleh MOHD ISKANDAR
OTHMAN

BUTTERWORTH

C'daa Serunding Moist Utara

Pengusaha: Rashidah Mohd Sultan
Lokasi: Butterworth, Pulau Pinang
Produk: Serunding daging dan ayam
Facebook: Serunding Moist Utara
WhatsApp: 011-1545 6518

Bergelar ibu tunggal selain perlu membesarkan dua orang anak termasuk seorang orang kelainan upaya (OKU) adalah antara cabaran yang terpaksa dilalui Rashidah Mohd Sultan, 35, dari Kampung Teluk, Perai di sini.

Kesempitan hidup yang dihadapi selain perlu menyediakan perbelanjaan khusus untuk menjaga anak bongsunya yang menghidap autisme menjadi titik tolak buat Rashidah untuk cuba berniaga kecil-kecilan dengan harapan dapat mencari pendapatan sampingan sekali gus mengubah hidup keluarganya.

Tidak mahu mensia-siakan bakat memasak yang diwarisi daripada ibunya, Rashidah memilih untuk menghasilkan serunding daging dan ayam pada 2015 dengan menjual kepada kenalan dan rakan di tempat kerja.

Bermula dengan hanya mengeluarkan sekitar lima kilogram serunding sebulan, perniagaan Rashidah semakin hari semakin mendapat sambutan hingga beliau terpaksa mencari tenaga kerja untuk membantu menyediakan tempahan pelanggan.

"Alhamdulillah percubaan saya menjual serunding menjadi dan beroleh pendapatan tambahan. Ia membuatkan saya mahu mengusahakan perniagaan ini dengan lebih serius termasuk mendaftarkan perniagaan untuk menghasilkan produk jenama sendiri.

"Bagi memastikan serunding

dihasilkan dapat dipasarkan secara lebih meluas, saya memperkasakan lagi bungkusan produk termasuk menghasilkan label tersendiri," katanya ketika ditemui *Sinar Harian* di sini semalam.

Dengan menggunakan jenama C'daa Serunding Moist Utara, Rashidah kini dalam proses untuk mendapatkan premis yang lebih sesuai sebagai tempat untuk menghasilkan produk makanannya itu. Beliau juga mahu mendapatkan sijil Makanan Selamat Tanggungjawab Industri (MeSTI) daripada Kementerian Kesihatan Malaysia.

Mengakui tidak mudah untuk mengendalikan perniagaan ini, Rashidah berkata, pelbagai dugaan pernah beliau tempuhi sepanjang lima tahun bergelar usahawan.

Peralatan

Namun, beliau bersyukur apabila mendapat bantuan melalui Program Basmi Kemiskinan Rezeki Tani bimbingan Lembaga Pemasaran Pertanian Persekutuan (FAMA) Pulau Pinang dengan menerima pelbagai bantuan peralatan pada tahun 2019.



Salah seorang ejen yang memasarkan produk C'daa Serunding Moist Utara.



Rashidah menunjukkan produk yang dihasilkan.

"Bukan mudah kerana dalam masa yang sama saya perlu bekerja, menguruskan keluarga dan memastikan pengeluaran produk dapat dihasilkan dengan baik.

"Pernah suatu ketika serunding yang dihasilkan tidak menjadi, santan basi dan daging hancur," cerita beliau.

Ditanya mengenai pemasaran produknya, Rashidah berkata, jika sebelum ini ia hanya dijual kepada rakan terdekat, kini C'daa Serunding Moist Utara boleh didapati di kedai serbaneka, kedai runcit, stesen minyak terpilih termasuk beberapa restoran dan kedai makan di sekitar Pulau Pinang.

Melihat kepentingan promosi dan perubahan strategi pemasaran yang perlu dilakukan, Rashidah berkata, produknya itu turut dijual melalui aplikasi e-dagang seperti Shopee serta laman sosial selain ejen jualan di beberapa kawasan di negeri ini.

"Ketika negara se-

dang berdepan Perintah Kawalan Pergerakan (PKP) ia secara langsung memberi kesan kepada perniagaan saya sehinggakan produk tidak dapat dijual.

"Namun, dengan memanfaatkan teknologi dan pemasaran digital, produk saya kembali terjual dan mendapat permintaan dari seluruh negara hingga mencapai pendapatan RM20,000 sebulan," katanya.

Bertekad mahu mengembangkan lagi perniagaannya, Rashidah berkata, beliau bercadang untuk menghasilkan produk baharu iaitu sambal daging carik yang dilihat mampu mendapat sambutan.

Enggan berasa sesela dengan pencapaian sekarang, usahawan wanita itu bercita-cita mahu memperluaskan lagi pasaran termasuk menembusi jualan di pasar raya terkemuka di seluruh negara.

"Pastinya serunding yang dihasilkan ini berbeza dan mempunyai cita rasa sendiri malah ia sesuai dihidangkan bila-bila masa sahaja dan bukan hanya pada musim perayaan.

"Dengan rasa pedas dan manis, C'daa Serunding Moist Utara boleh dimakan oleh semua peringkat umur," tambah beliau.



Serunding daging dan ayam yang kini mendapat tempat di pasaran.



17 SEP, 2020

Pasarkan serunding ke seluruh negara

Sinar Harian, Malaysia

Page 2 of 2

SUMMARIES

Rashidah memanfaatkan teknologi digital jual produk, raih pendapatan sehingga RM20,000 sebulan

BUTTERWORTH C'daa Serunding Moist Utara Pengusaha: Rashidah Mohd Sultan Lokasi: Butterworth, Pulau Pinang Produk: Serunding daging dan ayam Facebook: Serunding Moist Utara WhatsApp: 011-1545 6518

Bergelar ibu tunggal selain perlu membesarkan dua orang anak termasuk seorang orang kelainan upaya (OKU) adalah antara cabaran yang terpaksa dilalui Rashidah Mohd Sultan, 35, dari Kampung Teluk, Perai di sini.